



NUTAARSIASSAT

Inatsisartut Siulittaasuannit
Lars-Emil Johansenimit

Ukiup affaa kingulleq 2014



Folketingip Kalaallit Nunaanni ukiumoortumik paasisasarsiorluni angalanerani ilasseqatigiinneq

Inatsisartut Siulittaasuut Naalakkersuisut Siulittaasuut peqatigiillutik Folketingip aallartitai ulloq 23. juni Hans Egedep Illuani ilasseqatigiinnermut qaaqqaat. Ilasseqatigiinnermi attaveqarfissanik



naapitsiviuvoq aammalu Inatsisartunut ilaasortat illumi oqaluttuasartalimmi suleqatimik danskit naapinnissaannut periarfissinneqarput.

Nunavumit tikeraartut

Nunavumi premierministeri Peter Taptuna aammalu ilinniartitaanermut naalakkersuisoq Paul Quassa ulloq 1. juli Inatsisartunut pulaarput. Inatsisartut Siulittaasuata aallartitat Inersuarmi takuniaatippai. Nunap inatsisiliortuisa suleriaasiannik maleruagassaannillu sukumiisumik



nassuiaasoqareernerani kaffisortarfimmi kaffillertoqarpoq kaagillertoqarlunilu. Inatsisartunut pulaarneq aallartitat Naalakkersuisunut pisortatigoortumik pulaarnerisa ilaatut ingerlanneqarpoq.

Kunngissakkut tikeraarnerat

Kunngikkormiutut ataqqinassusilik Kunngissaq Frederik aamma Kunngikkormiutut ataqqinassusilik Kronprinsesse Mary meeqqatik ilagalugit ulluni 7.-8. august Nuummumut tikeraarput. Inatsisartut Siulittaasuat, Inatsisartut allattaanerat siulittaasoqarfiullu allattoqarfiani pisortaq ulloq 7. august Hans Egede Illuani Naalakkersuisut tikilluaqqusillutik pisortatigoortumik nereqatigiissitsineranni peqataanisamat qaaqquneqarput.



Ulloq 8. augustimi kunngissakkut Nuup Saavanut kunngikkut umiarsuaanni Dannebrogimik pisortatigoortumik tikinneranni Inatsisartut Siulittaasuat, Naalakkersuisut kommunalbestyrelsilu peqatigalugit peqataavoq. Nuummi innuttasut amerlasoorpassuit najuupput aammalu meeqqat inersimasullu erfalasaralersorlutik nikorfasut pisarnertut assut nalliuttorsiorpa-laartitsillutik.

Ulloq taanna kingusinnerusukkut siulittaasup kunngissakkut meeraallu Inatsisartuni tikilluaqquai. Siulittaasup Inatsisartuni takuniaatippai aammalu Inatsisartut oqaluttuassartaannik kiisalu Inersuarmi kussaait oqaluttuassartaannik oqaluttuullugit. Kunngissakkut meeraasa siulittaasoq soqutiginnillutik tusarnaarpat, siulittaasullu sølvimik nøgleringiliaq Buuti Pedersenip Nikolai Appelillu suliaat meeqqanut tammajuitsussatut nuannaarluni tunniuppa.

Naggataatigut siulittaasoqarfimmi ilasortat ilaat kunngikkut umiarsuaanni Dannebrogimi ilasseqatigiinnermut peqataapput.

Attaveqaatitut Ataatsimiititaliap Folketingip siulittaasoqarfianik ataatsimeeqateqarnera

Attaveqaatitut Ataatsimiititaliap Folketingip siulittaasoqarfianik Inatsisartullu siulittaasoqarfianik ukiumoortumik ataatsimeeqateqarnera ulluni 25.-28. august Ilulissani Qeqertarsuarmilu ingerlanneqarpoq.



Nunat naalakkersuisunikut inissisimmanerat oqaluuserineqarpoq. Inatsisarteqarnermi misilittakkanik avitseqatigiittarnissamut ataatsimullu unammilligassat oqaloqatigiissutigiginissaannut periarfissaqarnissap pingaaruteqarnera erseqqissaatigineqarpoq, pingaartumik ukiuni makkunani Kalaallit Nunaata Folketingimi soqutineqarnerata annertu-nera eqqarsaatigalugu.

Folketingimi Inatsisartunilu ataatsimiinnerit tusagassiorfinnut innutta-asunullu qanoq ilillugit kajuminnarnerulersinneqarsinnaanersut oqallisi- gineqarpoq. Inatsisartutigoortumik sulinerup tusagassiorfinnit soqutigi- neqarnerulernissaa Folketingip anguniagaasa ilagaat. Assersuutigalugu akunnerit naalakkersuisunut apeqquteqarfiusut TV-kkut toqqaannartu- mik aallakaatinneqartarnerisa iluaqutissartaat ajoqutissartaallu aam- malu Folketingimut ilaasortat atlantikup avannaamiut akunnerni naalak- kersuisunut apeqquteqarfiusuni siunissami ilaatinneqarsinnaanersut oqaluuserineqarpoq. Aammattaq inatsisinut nunatsinnut tusarniaas- sutigineqartussanut atatillugu suleriaatsit oqallisigineqarput.

Inatsisartut Siulitta-
asoqarfiat aammalu
Folketingip siulittaa-
soqarfia Attaveqaatitut
Ataatsimiititaliami Kalaal-
lit Nunaanni Danmarkimilu
paarlakaajaattumik ingerlan-
neqartartumi ukiumoortumik
ataatsimiittarput. Attave-
qaatitut Ataatsimiititaliaq
inatsisartutigoortumik suli-
nermit misilittakkanik paar-
laasseqatigiittarpoq aam-
malu ataatsimut soqutigisat
oqaloqatigiissutigisarlugit.
Attaveqaatitut Ataatsimiiti-
taliap 2015-imi ukiariartorne-
rani tullianik ataatsimiinnerani
Danmarki qaaqqusisuusaaq.



*Attaveqaatitut Ataatsimiititaliaq
Arktisk Stationimi.*

Nunat Avannarliit Killiit Siunnersuisoqatigiiffiata Vestmannaeyarimi ukiumoortumik ataatsimiinnera

Nunat Avannarliit Killiit Siunnersuisoqatigiiffiata ukiumoortumik ataatsimiinnera ulluni 1.-4. septembarimi Vestmannaeyarimi ingerlanneqarpoq.

Nunat Avannarliit Killiit Siunnersuisoqatigiiffiata ukiumoortumik ataatsimiinnera meeqqanut inuussuttunullu atuakkianut Nunat Avannarliit Killiit Siunnersuisoqatigiiffiata akissarsiaritittagaata Andri Snær Magnasonimut atuakkiaanut "Tidskisten"-imut atatillugu tunniunneqarneranik aallarnerneqarpoq. Tamatuma saniatigut akissarsisinneqarnissamut innersuunneqarsimapput Kalaallit Nunaannit Kathrine Rosingip atuakkiaa "Nasaq teqqialik" aammalu Savalimmiumit Bárð Oskarssonip atuakkiaa "Flata Kaninin". Meeqqanut inuussuttunullu atuakkianut akissarsiaritinneqartartoq ukiut allortarlugit tunniunneqartarpoq 60.000 kr.-inillu aningaasartaqarluni.

Nunanit ilaasortaneersunit ministerit ataatsimeeqatiginissaat Nunat Avannarliit Siunnersuisoqatigiiffiata ukiorpasuarini kissaatigisimavaa. Taa-maalillunilu ukiumoortumik ataatsimiinnermi nunat avannarliit killiit nunanut allanut ministeriiniq ataatsimeeqateqarnissaq pilersaaruserneqarpoq. Nunanut allanut ministerit ataatsimeeqatiginerisa kingorna Nunat Avannarliit Killiit Siunnersuisoqatigiiffiata siulittaasoqarfia ataatsimiippoq. Ulloq Islandip præsidentiata nereqatigiissitsineranik naggaserneqarpoq, præsidentillu Nunat Avannarliit Killiit Siunnersuisoqatigiiffianni ilaasortat, allattoqarfik, qaaqqusat aammalu nunanut allanut ministerit najukkamini tikilluaqquai.



Nunat Avannarliit Killiit Siunnersuisoqatigiiffianni siulittaasutut nutaatut qinerneqarpoq Bill Justinussen Savalimmiunersooq. Siulittaasuuffik Lars-Emil Johansenip ukiup tulliani ataatsimiinnermi tigussavaa.

Ukiumoortumik ataatsimiinnermi suliniaqatigiiffinnit assigiinngitsunit saqqummiussisussat aggersarneqarsimapput suleqatigiiffiusinnaasunut assigiinngitsunut siunnersuutiniq saqqummiussaqtut. Ilaatigut Egill Þór Níelsson nalunaarusiorsimasooq aggersarneqarpoq. Nalunaarusiaq nunat avannarliit killiit akornanni aalisarneq, niuerneq aningaasalersuinerlu, killilersugaanngitsumik niuerneq, assartuineq attaveqarnerlu kiisalu upalungaarsimaneq pillugit suleqatigiinnissamik periarfissanut attuumassuteqarpoq. Nalunaarusiaq 2015-ip aallartinnerani Aasianni aalajangersimasumik qulequtaqartitsilluni ataatsimeersuarnermi oqaluserinninnermi tunngavigineqassaaq.

Kalaallit Nunaanni Savalimmiunilu pisanik tunisassianillu tuniniaanerup ajoquserneqarnissaa pinngitsoortissinnaajumallugu isummersortartut assigiinngitsut naammattumik paasissutissinneqarsimannginnerat ilimagineqarmat EU-p puisip amianik nioqqutisianik eqqusseqqusinniginnera aammalu Savalimmiuni niisarnanik piniarneq pillugit

paasititsiniaanerup suleqatigiissutigineqarnissaa kissaatigineqartoq aamma oqaatigineqarpoq. Kiisalu Nunat Avannarliit Killiit Siunnersuisoqatigiiffiata ukiunik 30-nngortorsiornera 2015-imi Savalimmiuni ukiumoortumik ataatsimiinnermi nalliussineqarnissaa Nunat Avannarliit Killiit Siunnersuisoqatigiiffiata siulittaasoqarfiata piareersarppaa.

Nunat Avannarliit Killiit Siunnersuisoqatigiiffiata kaammattuutit aalajangersagai

Nunat Avannarliit Killiit Siunnersuisoqatigiiffiata ukiumoortumik ataatsimiinnissaa sioqqullugu kaammattuutit aalajangersakkat marluk nassiunneqarput.

Kaammattuutit aalajangersakkap aappaa 1/2014 Nunat Avannarliit Killiit Siunnersuisoqatigiiffianni ilaasortat suliassaqaarfiit suleqatigiiffiusut pillugit nunani pineqartuni naalakkersuisunut apeqquteqarsinnaalernissaannut tunngavoq. Periarfissaq tamanna Nunat Avannarliit Siunnersuisoqatigiiffiata ataani periarfissaareerpoq. Kaammattuutit aalajangersakkap aappaa 2/2014 umiarsuit svovlimik aniatitaminnik, pingaartumik inunnut uumasunullu sinerissamiittunut ajoqutaanera pillugu annikillisaanissaminnut periarfissaannut tunngavoq.

Kaammattuutit aalajangersakkat marluusut akuerineqarput nunallu ataasiakkaat inatsisartuinut saqqummiunneqassallutik.

Siulittaasoqarfiup taamatuttaaq Nunat Avannarliit Killiit Siunnersuisoqatigiiffiata ukiunik 30-inngortorsiorinnissaata malunnartinniarnegarnissaa sulissutigaa. Tamanna pissaq 2015-imi Savalimmiuni ukiumoortumik ataatsimiinnermi.



*Nunat Avannarliit
Killiit Siunnersuisoqatigiivisa
ulluni 1.-4. septembarimi Vestmannaeyjarimi ukiumoortumik ataatsimiinnerat.*

Franskit senatoriata André Gattolinip tikeraarnera

André Gattolin Franskit Senatianni senatoritut qinigaanermi saniatigut European Affairs Commiteemut (europamut tunngasunut ataatsimiittialiaq) allatsitut Senatimit qinerneqarsimavoq. Taamatut atuuffeqarnermini nalunaarusiaq 'Den Arktiske region og dets strategiske aspekt for de europæiske politikker' suliaraa.

Nalunaarusiani malitseqartillugu avatangiisinit pinngortitami pisuusutit aammalu Issittup silarsuullu sinnerata attaveqatigiinnerat pillugit oqartussaasunik susassaqtunik oqaloqatiginnikkiartorluni Nuummut tikeraarpoq.

Sammissassat anguniagassallu nunatsinnut attuumassuteqartut kiisalu inuiaqatigiit tamarmiusut ilisimasaqarfiginerulerumallugit senatorip ulloq 17. september Inatsisartut siulittaasuat pisortatiguunngitsu-



mik ataatsimeeqatigaa. Senatorip nalunaarusiani kiungulleq siulittaasumut tunniuppa.

Nunaqarfinni aqutsisunut ulloq 23. september pulaartoqarneq

Kommuneqarfik Sermersooq nunaqarfinni aqutsisunik isumasioqati-giissitsivoq, tamannalu iluatsillugu peqataasut tamarmik Inatsisartunut qaaqquneqarlutik. Inatsisartut ataatsimiittarfiat alakkartinneqarpoq Inatsisartoqarnermi periaatsit suleriaatsillu nassuiaatigineqarlutik. Tamatuma kingorna siulittaasoq ullup qeqqasiortitsivoq.

Nersornaasiineq

Ulloq 1. oktober Line Dalentoft sølviusumik Nersornaaserne-qarpoq nunatsinni pinaveersaartitsinermi aaqqissuussaanerup ineriartortinneqarnerani ukiorpassuarni suliaqarsimanini aammalu inuppassuarnik sullitaqarsimanini ikiuisimaninilu pissutigalugit.



Ukiakkut ataatsimiinneq ulloq 30. september aallartip- poq

Ukiakkut ataatsimiinneq 2014-imi septembarip ulluisa 30-anniit decembarip ulluisa 12-iannut ingerlasussatut pilersaarutaagaluarpoq, immikkoortut 108-t Inatsisartuni oqaluuserisassaasimallutik.

Oktobarilli ulluisa aallaqqaataani unnukkut qinersisoqarnissaa nalunaarutigineqarpoq, Naalakkersuisut Siuliuttaasuat Aleqa Hammond sulingiffeqarnissaminik nalunaarmat, taamalu Kim Kilesen naalakkersuisunut siulittaasunngorallarluni qinersinissarlu nalunaarutigalugu. Taamaalilluni ukiakkut ataatsimiinnerup sinnera unitsinneqarpoq.

Ulloq 12. december 2014 inissitsiterluni ataatsimiinneq

Qinersinerup kingorna decembarip ulluisa 12-iani Inatsisartut inissitsiterput. Inissitsiterluni ataatsimiinnermi Naalakkersuisunut, ataatsimii-titalianut siulittaasoqarfimmullu ilaasortaasussat qinerneqarput.

Inatsisartut Siulittaasoqarfiata maanna inuttarai: Siulittaasoq Lars-Emil Johansen, siulittaasup tullia siulleq Agathe Fontain, siulittaasup tullisa aappaat Justus Hansen, siulittaasup tullisa pingajuat Juliane Henningsen siulittaasullu tullisa sisamaat Nikolaj Jeremiassen.

